

«Saltar cun anim e plascher»

Prest dattan ils Movis lur producziuns da primavera a Mustér

„ (anr/hh) Las endisch gruppas dils Movis e lur menadras ein ella fasa finala dallas preparativas per lur presentaziuns da questa primavera. Sils aspectaturs spetga danovamein in bi program. Las presentaziuns han liug uonn ils 13, 14 e 15 d'avrel, danovamein en halla Cons a Mustér. 120 saltunzas e saltunzs ella vegliadetgna da siat entochen 55 onns da Trun entochen Tujetsch saultan tenor musica da rock e pop. Leutier vegnan las coreografias, per mintga gruppa ina speciala. 13 menadras han buca mo luvrau intensivamein ils davos meins cun las saltunzas ed ils saltunzs, mobein era preparau avon ils tocs da musica e la coreografia corrispundenta. «Tut tenor las habilitads dalla gruppa ein ils singuls moviments vegni studegiai ed exercitai», di la menadra *Esther Hendry*. Dapi 18 onns sepresentan ils Movis mintg'onn alla tribuna ed era uonn ei quei il cass tenor il motto: Da cuminonza va tut pli tgunsch. «Movis ei sesarver, encurir ed anflar in l'auter, semuentar da cuminonza e luvrar vid la medema finamira», puntuescha Hendry ch'ei stada a sias uras ina dallas fundaturas dils Movis. Al mund ch'ei signaus da stress, pauc temps, digitalisaziun e consum, lessen ils Movis dar ina cunterpeisa: «S'entupar, respectar in l'auter, semuentar, saltar, sentir sesez, esser creativs, rir, anflar la fidonza en sesez e parter il plascher cun giuven e vegl.» Las gruppas saultan uonn tenor musica d'enconuschentas gruppas ed interprets sco Andrew Bond, Ed Sheeran, Michael Patrick ni era Symphoniacs, Colbie Caillat e Kiesza. Danovamein ein las presentaziuns pusseivlas mo cun grond engaschament dallas menadras, mo era d'autras personas che sestentan davos las culissas.

Las presentaziuns han liug il venderdis, ils 13 d'avrel 2018 e la sonda, ils 14 d'avrel 2018 mintgamai allas 20.00 e la dumengia, ils 15 d'avrel 2018 allas 14.00 en halla Cons a Mustér.

